



另外有一種人

特教班个先生入院，臨時尋毋著人代課，拜託佢暫時代班。成個月个時間，對麼个都毋識到熟絡、到下課還分學生纏緊，試著應這事已值！半生人教普通班，雖然講牛頭、猴精、南蛇……逐年都會來相堵頭，千百樣个學生、百百種个問題，年年、月月、日日都來練吾耐性、測吾底線，總係孫猴精碾毋出如來佛个手巴掌，較變乜毋成精怪。這一個月个時間係緣分、係挑戰，無共款个領域，無共樣个體會，前半生人係教學生，這個月嘎倒貶。少少个五個學生，逐個都係吾先生，對厥等身項學習著个，書項無寫，同天地个愛共樣，毋使講，自然知得。

六年生个阿福，二年生个程度，識字無多，堵著愛算數該下，手指總毋罣拗，歸去教佢用計算機。讀書無半撇，毋過手腳一等溜掠，已煞猛，鑪地泥、掙桌一儕使得當兩人用，盡分人阿腦个係，搵這搵該總係笑咪咪，也毋識看佢同人冤家起戇面，爺哀共樣也毋係正常人，阿福毋曉煮也毋會收摺，一大帳善心人送个衫褲，歸屋家人對上層著到下層，搵搵嚟又過對下層著到上層。朝脣頭長在目摸目罣斯來學校，好得二年生个嬌嬌女阿美，撿食過拈纖，早朝輒輒都食毋去，堵到厥面前監佢食，錫都脣口五年生个阿富口涎落落跌！阿富五年生，普通班一年生課本肚个字，佢識毋透，嘴孬孬、頸根還過歪一片，好得人生來高大緣投，無斯會嫗都厠毋得！高罔高，喊佢掙玻璃，無掙無恁死，掙撇逐埕玻璃都有一幅畫，做事、寫字懶停動，有好食走第一，好事打頭名，普通班學生已好撼佢，佢嘴開開、笑咪咪同厥等搞都貶轉來，屋家置，爺哀無大神氣加插佢，佢天生天養共樣恁高恁大。

共樣五年生个阿展，中度自閉症，歸身疤了了，毋係分人打來个哦，係舊孔口加新孔口，見結痢斯掙，總愛掙到血流血蒂正甘願，咄佢無效，竹擎緊佢還會同你搶，腳也會來蹬人，好得生來矮細力頭無大。醒醒个時節，手項定著有張紙緊拂，嘴項還「欵」無停，實在斯已吵人！屋家算來真過得，厥姆驚佢吵人學習，交代分佢食藥，毋過藥食落去佢斯睡歸日，當晝喊佢食晝還會變面，無斯戇神戇神嘴緊呷頭那緊額，偲看佢衰過，轉想下，係毋係也係有福氣个人？阿錦正入學，嘎比二年个阿美高半粒頭那較加，兩個細阿妹，好个時節下課手牽手滿哪邊，冤家該下斯艱苦咧，盍零个阿美面臭臭毋插佢，屋家帶來个噏嗒，一粒都無打爽，山肚來个阿錦嘴擘擘哪佇得著？逐回都來尋先生做公親，阿美乜好講話，一下那斯雨過天清，麼个仇、麼个恨，像風吹過，毋識留蹤跡！

少少个五個細人，逐個狀況都無相同，相同个係，嘴有好食、肚屎毋會枵、先生有阿腦，厥等斯已滿足咧！逐日歡歡喜喜來學校，歡歡喜喜轉屋家，一般人看厥等像生癌个病人，係衰過、係同情，標準無共樣，偲哪會知得仰脣正係有福氣！

作者：劉玉蕉

☆詞彙學習☆

【應】rhin+：允諾。

【拈纖】ngiam+ siam+：挑剔、吃得極少。

【南蛇】namˋ shaˋ：此處引申懶惰蟲。

【堵到】du+ doˋ：推到。

【歸去】gui+ kiˋ：乾脆。

【厠毋得】o+ liˋ mˋ dedˋ：形容難以忍受。

【起戇面】kiˋ ngongˋ mienˋ：翻臉不認人。

【大神氣】taiˋ shinˋ kiˋ：多餘的精神、氣力。